

12 545 28

1570 11 720

II h
1043

Abzug etlicher

Practica und Propheceyen. Sibille.

Brigitte-Cirilli/ Joachim des Abts-Methodij-vñ binder Keins
hartz-wirt weren noch etlich iar/vñ sagt vō wunderlichē dingē.

X 197 616



BIBLIOTHECA
PONICKAVIANA

UNIVERSITÄT
HALLE
(SAALE)
BIBLIOTHEK

[Faint, illegible handwriting on aged paper]



Ptolomeus ein hochgeachter meyster

des himels lauffs-mit sampt andern in der kunst der Astronomie
Auch die Philosophi der naturliche kunst-Auch tegliche erfahrung
lernet vns das-Auch der heylige Augustinus in dem buch vñ der
heyligen stat gottes genant-ziehent alle zu gleych vber ein-vñ hal-
ten das d̄ himel nach got der aller ding ein schöpffer-herr-künig
vber alle künig ist-vñ die bewegligkeyt der gestirn regiren vñ ver-
keren die leybliche creatur der welt-welcher ergeung ist geschubert
im himelischen Circkel-vnd in dem anplick des himels-vñ nichts
irdisch erfunden das nicht ein gleich formig sach am hymel het/d̄
halben ist nit an zunemē das th̄oret geschrey d̄ bösen mēschen, die
als vnweyßlich zu banck hawen-vnd reden wider die meyster der
Astronomie-auch wider die selbigē kunst-welche doch vñ vernis̄
kōndt erkennen vnd den menschen zu gut offenbaren maniche zu-
kūnstige geschickligkeyt diser welt-In welcher mā got loben vñ
eren sol-vnd in bitten das er von vns wöl wenden alle schedliche
ding-die vns vber Jar betreffen möchten-eintweder durch krieg
krant̄heyt vnd vngewitter der monat vnd der tag. Der halben/
sintemal got in der ewigkeyt alle ding geschaffen hat vnd verord-
net zu nutz der mēschen-So sol billich kein mensch zweyfel-sun-
der vest halten-das durch die ewige weyßheyt gottes der lauff d̄
gestirn vñ die bewegligkeyt des grossen schönē vñ weyttē himels
vñ zu gut beschaffen ist-Auff das wir nichts gedencken-oder be-
ginnen vnfurchtiglich solten/sund̄ das wir auß dem wunder-
barlichen einfluß der Planeten vnd anderer gestirn erkennen die
zukunfft manicher ergeung durch windt-regen-vberflüssigkeyt in
Jaren-tewrung-seuch-gesund̄heyt-krieg-oder gutten fride-Auff
das man kōndt ratz pflegen-sollichem vnglück vor zu kummē zu-
geteühung der gemein-vñ enthaltung Künig Fürsten Landt vñ
Stet-Demnach solt mā billich groß vorhaltē die kunst der Astro-
nomy-dardurch wir erkünden gegenwertige ding-vñ in die ver-
nunfft widerumb bringen die vergangen/Auch die verkūntig der
zukunfftigen ding/welcher zukunfft ein kunst erfarnet der Astro-
nomy nutzlich-warhafftig anzeyge auß naturliche sachen-dañ
sein kunst ist ein regel vnd ein gezeng-welches offentlich entdeckt

Die werck die do erscheynen auß der natur/stell der Planeten vnd
zeychen des Circels der thier/in welchen sie iren gewalt habē vñ
sie üben. Der halben Christus die götliche warheyt bezeygt mit
nachfolgenden wortten/wan künen wirt die verenderung so wer
den zeychen in der Sonnen/Mon/vñ gestirn gescheen. Auch heile
der lerer Gundobonati/vñ ist mir glaublich das christus darumb
zu seinen iungern gesagt hat/do er widerumb wolt ziehen in das
Judische landt. Seind nicht zwelff stundt im tag. Als ob er wolt
sagen. Ein stundt ist böß/darin die vermaledeyten iuden ein ver
keren willen trugen wider in Christum den almechtigen got vñ
schöpffer der welt. Auch ist ein gutte stundt die er erwolt hat vñ
ist zu in gegangen. Auch die heyligen alueter Abraham vñ Moyses
haben sunderlich arbeyt gehabt auff die ordnüg vñ viertheylschein
der Planeten vñ lauff der hymel fleysig verhalten vñ erforscht.

Nach Keyser Friderich dem Dritten

wirt so grösslich vberhandt nemē die vngerechtigkeyt vñ vntrew
vñ grosse verfolgüg. Das vnter Keyser Friderich dem drittē frid
lich gewesen ist/gegen der zeyt die yetz ist vnd noch wirt. Davon
der Psalmist sagt. Oberflüssigkeit des fridē wirt vō dan genumen
so lang bist der Mon vō dan genumen wirdt. das ist das heylig
Römisch reych. Douon spricht Paulus d apostel. Ir solt wissen
das in den letzten tagen werden künen ferliche zeyt. so sie vor nie
gewest sein. Es wirt sollicher iamer vñ betrübnuß werden xxiiij.
Jar. Darumb so forchtet got. vñ erent das Römisch reych. wan
wan das Römisch reych vergeet. so muß vō not wegen die welt
zergeē. In diser zeyt wirt vber wintlich ein Franzoß. vil teütscher
erschlahen. Zum letzten wirt der Franzoß vnter ligen. Vnd der
Keüsch am angesicht wirt regieren an allen endē. vñ behalten das
regiment von Ouenth bis in Occident. Vnd vnter disem Keyser
sollen geendt werden die anfechtung der geystlichen.

Von etlichen Coniunction was yeg liche bedewt hat vnd noch bedewtten sol.

¶ Der eine ist gewesen in der wefferechten triplicitet. Im Jar des heyls. M. CCC. vii. lxxv. Im achten grad Scorpionis volendet vnd zwey die vergangen seind vnd aber ander zwey der selbigen nach volget in der lufft triplicitet im Zwilling vñ dem Wasserer geweest seind. Die dritte nach denen ist gewesen ym Jar der gnade M. CCC. xxv. wider in des Wasserers triplicitet. Im. xiiij. grad des Scorpionis vnd ist bis auff. M. CCC. lxxviiij. Jar darin gewesen vñ ist vast erklet das ein prophet gebore sey wordē ich meyn der Sophy sey es in Persia. Wider zu erklaren von etlichen Constellation was sie gebracht haben vnd noch bringen werden in nach kumenden Jaren/dan die grosse Coniunction ym Scorpion vñ dem bild Erodiam. Vnd so handt ein newe sect funden die Ketzer meyster von Behem Wickless. Johanes Huss vñ Rokenza. Aber die yetzund Coniunction im. M. CCC. lxxviiij. vnter dem erschrockenlichen bilde des angeprandten dardurch wir die Römisch Kirch versten die leyder leyden wirdt die geystlichen. Darnach wirt eine kumen vñ Wasserer dardurch das Römisch reych wirt auff hören vñ abnemen vnter dem bild Alporas. Vñ darnach ym Steynbock werden wir ein andere sehen vnter dem bild des Adlers dardurch das reych wirt zerschliessen in zehē teyl Auch wirt ein andere kumen in der Wage darunder wirt geboren von dem geschlecht Dan ein kindt das vil böses thun wirt wann etliche meyster rechnen yetzlichen Planeten tausent Jar regieren mit hilff der andern So wirt es noch vber zwey. CC. vii. lxxvi. Jar sibentausent Jar gerechent. ¶ Nach d geburt Jesu Christi M. CCCC. xv. dan sol kumen ein reynigung der welt.

¶ Vil glantz der kirchen werden dunckel werdē da selbs in Teutischen landen vnd in Franckreych dann die zukunfft des selbigen Königs wirt kumen on zeychen wann er wirt sprechen. Frid vñ sicherheyt sey denen die im reych wandeln so wirt vber sie kumen ein schneller vntergang.

Erzellung etzlicher Jar.

¶ Wan mā zelt. M. CCCC. xvi. xvii. vii. xviii. Jar so wirt vil

sewung gegen Orient- vnd grosse angstperkeyt der selbigen her-
schafft- vñ wirt gut in Occident. In Vngern Behem Merheren
Polen vnd Meychssen- vñ da vmb wirt grosse anfechtung/ dan
wirt in Occident gut glück erscheynen/ Aber die vō Orient werde
vil vnbequemer ding leyden/ das Zepter des gantzē vnglück wirt
vber sie kumen. Vnd ich glaub das die Kirch vō Prag- mit dem
Constantinopolitanischen reych auff die zeyt wider gebracht soll
werden zu der mutter der glaubigen- vrsach der tribulation- dan
vil werden streben wider sie beyde- Löwen Vögel vñ auch Thier
auff dem mittag vnd der mitternacht vñ von der iunckfrawlichē
erden. Vnd wirt ein newe widerbringūg vñ schickung vnter den
Iouisten vnd regierern der Kirchen.

So mā zelen wirt. M. CCCC. xxij. vñ. xxiiij. gar nahent funff
Jar- wirt wider kumen böse zeyt- hunger- kalte zeyt- lange winter
Vnd gen Occident mit einer schnellē pestilentz- vñ die rinder wer-
den sterben- Es wirt so seer kalt sein- das die vögel in welden vnd
vnter den dechen sterbē werde- vñ die thier werden in den welden
hungers sterben- Vil wasser wirt werden ym Sum̄er Vnter den
Pawri vñ vnedeln wirt ein verpintnuß gemacht wider die edeln
vñ mechtigen- die newe ding dem volck an müten die vor nie mer
gehört seind. Vnd vil mechtiger werden hoch herab fallen. Vnd
vnter den Chürfürstē des reychs wirt entsten vngehörte vneinig-
keyt/ O leyder dan werden die kirchen leyden- Die geystlichen wer-
den betrübt an vil enden des Keyns. Vñ die Fürsten vō Occident
werden versuchē vil Schloß vnter sich vñ iren gewalt zubringen
Owe grosse verreterey- kein glaub wirt sein in den gewaltigē. Es
wirt ein newer auff steen- s wirt reformirn vil in der kirchē/ nach
langer vneynigkeyt. Der geystlich standt wirdt trawren- dan sie
werden verlierē vil gottes lehen- vñ werden ein genügen haben in
wenig- nit als bey sant Siluesters zeytten- der die kirchē reych ge-
macht hat.

¶ Darnach wirt steen der reyn vñ die geystlichen in guttem fridē
vñ die vneynigkeyt vñ gezencē wirt abgenumen von in- vñ wirt
ein newe Reformation- ein new gesetz- vñ ein new reych/ ein erlich

sichtig leben. beyde in geystlichem vñ weltlichem standt. vñ allein die bey dem Nere werdē trawren sunff Jar lang. Vnd d̄ Türck in seinen letzten Jaren seines Regiments in Occident inhaben die anstossendē lande. vñ wirt nit verr vō Cōlen todt geschlagē. Vñ das reych vō Drabisand wirt durch die Creützer wider bracht zu dem veterlichē erb christi. Vñ die teütschen Ionisten vñ die Ritter des Creütz werden wider bringen Preysen mit den anstossenden landen. zu irem aygentumb. Vnd die Polen vñ Reüssen werden leyden einfal in irer substantz. vñ verlierung ires gutes in iren landen. Vñ Saturn⁹ selbs mit dem Mars wirt umbtreiben als mit götlichem rach die ihenen die wider die kirchen streben vñ ire Ritter. wan er vergifft den schwantz der Fische. vnd die hörner des Stiers in der ersten Revolution. die ytzund geschēhē ist. Vnd so werden trawen die Türckischen mit den zerstreuten vō der schar der Christen. Vnd alsdan wirt wider wachsen die kirchen in dem standt der ewigen liebe. Die Engelen der vnd die von Brittanien mit den am Nere gen Occident. werden leyden in iren reysen vill ferligkeyt vnd umb treybung.

¶ Darnach werdē die Römer / Negopolitaner. vñ die an des Nere gen dem mittag / krieg habē bis in Gallicien. vnter in do wirt sein hunger vnd krieg. Vñ ein newer König wirt betrüben vil lande. er wirt herscher von mittagischen Nere bis an das Occidentisch Nere. dem werden vnterthan sein vil thier vñ vōgel. Vō tyrannischem gehorsam werdē trawrig sitzen die stat Rom. vñ ir aller heyligster Bischoff. seuffzen in mitleydung. das sich nahent die zeyt. darin wirt vergossen das vnschuldig plut in den landen. Die Teütschen werdē sich frewen das sie handt funden ein newe einsetzung. Vnd zway hörner werden regiren in Teütschen landen. Das volck on ein haubt wirt im erwöllē ein Fürsten. dan es wirt so größlich gezeichnet mit des schwert vñ mit prant. das es wunder wirt sein. Vñ ein volck eins hartē haubts wirt vnterworffen dem Römischen reych. vñ dan wirt das Reych steen in fridē bis in. M. CCCC. lxxi. Jar. Aber hie zwischē wirt es mancherley leyde. vrsach laß ich fallen. Davon redt Joachim in dem buch d̄ tribulacion. das ist der umbtreibung zu dem vall Jericho. d̄ welt

hoffart die bedewt das dan zerstört soll werden vil Königreich
die do künien werde wider die teutschen Israheliten/aber sie wer-
den nit umbestritten vmb Maximilianus willen-dan er wirt seinen
schild in die höhe hebē- vñ habē hilff vō den mēschen vñ vō got.

¶ Vom König von Ungern/du wirst auch ein ander volck zam-
machen vnd dein letztes lob do enden. Aber nach dir wirt künien
ein grösserer dann du bist/als ein lange geysell gottes schlagen die
vngetrewen hundert. Dese ding nemen bewerung auß dem herscher
deines landes. Vnd das Volck Sagittarij wirt regierē lange zeyt/
vnter deinen christen-vñ das reych von Ungern wirt gebē einem
andern- der wirt seer milt vñ barmhertzig sein gegen der kirchen-
vñ wirt wider zu recht setzen die kirch vō Prag- vñ sant Sophien
kirch zu Cōstantinopell- vñ wirt hoch steygen vnter dē christen-
Aber er wirt nit sein vō dem geplüt Mathiaschko/sonder vō den
hohen felsen des Teutschē landes wirt er auffgeen- vñ ein purer
umbeflecter König.

¶ In dem buch Cirilli steet-ee die kirch ernewert wirt-so wirt goe-
verhengen das-das Babstumb wirdt ledig steen werden/ grosse
zweyfeltigkeyt zwischē dem Teutschen Keyser-der in sein macht
getrawet/widersteet zu ordnen vnd setzen einen Babst-vñ so die
Römer vnd walchen werden widersteen dem grossen Adler-wirt
der Adler im grūm vñ zorn entzundet/wirt mit allein die Teutschē
sonder von allen orten böß volck zusammen bringen in sein here-vñ
mit gewapnetter handt wirt er gen Rom künien-vñ alle Prelatē
der kirchen-religiosen-bürger-vnd ander wirt er fahen-peynigen
vnd tödten/mit mancherley peyn-darumb werden sie die platten
verscheren lassen- die andern werden fliehen in die wald vñ berg-
Zinden nach so auß gewürtzelt seind die premen vnd die dören der
bösen mensche-so wirt ein heylig man künien vnd wirt fridlichē
stillen den Adler mit der kirchen.

¶ Darnach wirt künien ein einziger man mit grosser heyligkeyt
erleucht-als Joachim im buch der einigkeyt spricht. Ein mā mit
grosser heyligkeit wirt erhaben- vñ gesazt in Römischen schul-als

ein Babst-durch den wirt got grosse miracel thun/ das inn alle
mēschen werdē forchtē vñ eren/ niemand wirt so kün sein-der thū
wider sein gesetz/er wirt verdānen vil gottes lehen vñ Rent- vnd
setzen das die Clerici leben vō den zehendē vñ dem opffer/ Er wirt
verbieten geschmuck der kleyder/ alle vnzüchtige ding/ denze-ge-
senge/ vñ das die frawen seer züchtig vñ erlich geen one golt- vnd
edel gestein vñ wirt gebieten das man predig die ewāgeli. Er wirt
steen im Babstumb kurze zeyt- diser aller heyligister man/ nit mer
dann vier Jar- alsdan wirt er faren zu dem herren.

¶ Darnach bald wirt got erwecken ander drey heylig menner- ein
nach dem andern- in tugenden vnd in wunderzeychen- gleych die
die vorgemachten dinge vnd gesetze bestetigen- vnter welchen die
Kirchē wirt wider wachsen/ vñ die werdē genant engelische hyrtē.

Von des heyligen mannes predig. der Frantzösisch vñ welsch landt durchzogē ist im. M. D. viij. Jare.

¶ Davon redt der heylig man vnd prophet- der zu vnsern zeytten
welsche landt vnd Franckreych bis in Hispania durch zogen ist-
schreyt vñ spricht- Er wacht ir chüstē menner vō dem schlaff der
sunden/ vñ schneydet auff die bandt ewers gehōrs- vñ aller ewer
sinnen. vñ vernembt meine wort mit fleyß. Darumb das ir die ge-
bot gottes- vñ das götlich wort habt ab geworffen in die gruben
der vnsauberkeyt- der vergeffung vñ verachtung/ vñ habt ange-
fangen in der öbung der vntugent- nerrisch vñ nachlessig- Aber in
der bößheyt gantz weyß/ listig- vñ fursichtig zu sein- alle billigkeit
vñ gerechtigkeit zu verkeren- in dem schweyß vñ plut der ellenden
vñ betrübtten witwen vnd weysen truncken zu werden- das hey-
rat gut christi in der wollustigkeit des leybs zu verschwenden- die
vnerschambt fleyschliche begir mit dem ebruch vñ schwēchig
der iunckfrawē- vñ aller vnzimlicher vñ vnnatürlicher vnlauter-
heyt. Widerumb ewere vnaussprechenliche geyttigkeit mit allem
falsch- vntrew- rawben/ vñ stelen- zu ersettigen. Vñ die kirchen ist
durch ewer bößheyt worden ein hauß des raubs/ dieberey/ vñnd

B

mörderey - in welchem nit gesungē werde die lobgesang des herren
sunder die gortlestertig vñ gortschwerung - lobgesang des teuffels
Darumb seind noch wenig tag - vñ die christenlichē stet werde fal
len bis zum grundt - der vsach halbē kleydet euch mit den secken -
der büß - rew - vñ leyde - vñ von dem meysten bis zu dem minsten /
lauffent dem herren entgegen mit ewrem weynen vnd klagen - so
mag geschehen das er sich vber euch - als vber die Ninuiten ges
chehen ist - erbarmet. So ir aber nit werde büß würcken - werden
die tag der tröbselen - angst - vñ not schnelligklich erscheynen - von
welcher angesicht ir fliechent an den gestat - Die fluß der wasser
werdt ir an rüffen / damit sie ewer leben gütigklichen entpfahen -
Ir werdt die höhe vnd die abschliff der berg an schreyen - damit
sie ewere cörper in der abfallig lindlichen entpfahen vñ abwelzē.
Item ir werdt die bawm in den walden mit waynendē augen an
betten - das sie ewre helf an tre est lassen hangen - vnd von den vö
geln verzert - es wirt ein solch heülen vñ schreyen vnter den christē
ersten - das einer zum andern sagen wirt - wer nit besser wir weren
in mutter leyb verdilget worden. Allein es werde etliche neydische
menschen gefunden - die dise red des heyligen mans verargen wöl
len / ist nicht gewissers das dise vngewitter d trübsalen - so ich yetz
ertzelt hab vñ noch vil grausamer als mans geschreyben kan vber
Teutsche - welsche - vñ Frantzosische lender - nochuolgent vber die
gantz christenheyt werden / darumb wol gesprochen mag werde -
Sant Peters schiflein hab sich an vil felszen der widerwertigkete
gantz zerklöbē. So aber die natürlich bewegung wil auch für ein
fabel gehalten werden - ist not das die götlichē ordnungen - die nit
gefelen mügen - wann sie entspringen auß dem pinnen der heylig
ged trüweltigkete - ein gefuert werden.

¶ Ich besorg bey dem lebendigen got - ditz sey die zeyt d trübsalen
der angst vñ der not - darinnen die heyligen propheceyen sollē er
fult vnd die christenheyt manigfeltigklich zerknicht werden - Ich
besorg es werde vns christen ditz begegnen das den Juden in zer
störung irer höch vñ zier begegnet ist - Als die selbigen sahen vnd
horten vil seltsamer wunderzeychē an himel - wie vormals ermele
ist - Keytzer im lufft / mit gulden stollen vnd spießen - mit einander

scharmitzlen hörten im heyligen tempel gotes wunderbarlich vñ
erschrocklich sauß vñ bewegungen vñ verachteten die ding alle
Am letzten wardt die stum im zugang des tempels gehört - Wir
wöllen von dannen ziehen - Bald darnach zergienge das Jüdische
reych. Ich forcht gleycher weyß als die wunderbarlich stum - Wir
wöllen von dannen ziehen - bedeutet hat den abzug der götlichen
gnaden vom Jüdischem geschlecht - Also die erscheynüg d creütz
zeychen - so wir die verachten vnd verspotten werden - bedewtten
den abgang der selbigen gnade gottes von dem Christenlichen
volck . Vnd als die barmherzigkeyt gottes ließ solliche wunder
werck zu Hierusalem in der haubtstat der Jüdischeyt geschehen -
Also yetz zu vnsern zeyten - leß er der gleychen wunderzeychen in
Teutschen landen - dem haubt oder dem hertzen der Christenheyt
erscheynen. Vnd auch als die Priester entpfunden - am ersten die
wunderwerck - vnd in dem inderstem Tabernackel der heyligkeyt -
Vnd die zerstörung gieng auß von dem Tempel - Also yetz und
sehen wir Priester die wunderzeychen am altar / in der götlichen
zeyt - Vnd wir seind die ersten die dise götliche zeychen vnd vor
botten verlachē - Ich besorg aller vnfall werdt vñ der kirchen auß
geen - die gantz Christenheyt vmbgeben / Darumb wan wir nicht
bald vmbkeren vnd abweychen vñ dem weg der vngerechtigkeit -
in die fußstapffen der gerechten menschen - besorg ich / wir werden
in dem werffell der trübseligkeyt ertrincken / darinnen die erstockte
Jüdischeyt versuncken ist . Vnd furwar wan ir die erbarmtlich
zerstörung der gantzen christenheyt - aller löblichen gewonheiten
ordnungen vñ gesetzen - das ellenden aller stende - die manigfaltig
keyt der plagen / die verenderung die zeyt / vnd alle seltsame zufell
zu hertzen nembt / habt ir das liecht begriffen mit dez ir durch den
finster nebell aller beschwerüg leychtlich vber künien - vñ alle vn
gefell so noch künfftig seind - scheynbarlichē sehen - darnach ob ir
wölt - auch entpflihen mögt - darzu mag helffen die heylig erma
nung des heyligen fursprecher vñ propheten Christi / in form vñ
gestalt des propheten Jone - vast durch alle Stet Françösischer
vñ Welscher lender predigent - die christen kleglichen ermanet buß
zu würcken / vnd sich zu got zu keren - wan das endt der welt na
hent herzu - vñ die bech der trübsalen werden die gantz Christen

heyt yetz yetz vber geen-welches wort hab ich zu bewertig meines
reden hierinnen ein teyl wöllen begreiffen-vnd seind die.

¶ Danon redt Reinhart in seiner offenbarung/vñ spricht. Nach
dem allem wirt künien der letzte Türck/der spricht er sey vō Sara
geschlecht/Aber er ist von Agar-Vnd seine nachkümlich heysen
Agareni-die werdē nit hewser bawen-sunder als wilde leüt durch
streychen die grossen wiesteney-wonend in gezelden/vñ leben von
rauben vnd was in werden mag-vnd vnter den Christen gen der
mitternacht vnd dem nidergang werden sie in übung des grimß
vbertretung alle grausamigkeyt d̄ wilden thier/vñ die gutten vñ
senssmütigen christen werden von inen zerstrewt.

¶ Darzu spricht Methodius. Es ist zukünfftig das noch ein mal
die Agareni gesamelt in teutschen landen aufgeen vō der wüßtig
vñ erobern den freyß des erdrichs im landt des Mondes durch
acht Jar lang-vnd wirt ir weg genant der weg Agareni Si wer
den Stet vñ Königreych vmbkeren-an den heyligen stetten wer
den sie die priester tödten-vñ bey den weyber schlaffen-auß den
kelchen vnd andern heyligen gefeß werdē sie trincken/vñ bey den
greber der heyligen werden sie ire viech thun binden zu schalck-
heyt den Christen. Vñ darnach werden sie bey Eölen alle erschla
gen. Vñ wirt kein christenlicher Fürst darbey sein-allein der vñ
überwintlich Fürst vñ König von Hispania-der den Türckischē
hundert ertöden wirt-dañ die erhebüg Saturni hat noch kein ende
Vñ der Türcken erhebung wirt nider fallen Es werden König-
reych vñ Fürstenthumb zu der kirchen bracht-dañ des Schützen
kinder-das seind die Spaniolen oder Ungern-werdē vberhandt
nemen vnter andern Christen/vñ vertragen die bößheyt des Sa
turnischen Türcken-vñ zerstören die leydigkeyt vnd iamer des ob
gemelten ungelücks/vnter dem eynigen Fürsten vñ kayser Mari/
miliano-oder dem erst gebornen Archangelis wirt künien ein pur
lautter schöne zeyt der seligkeyt-dan so vnter getrückt ist alle böß
heyt der stat vnd zeyt-So erkent der güttig Juppiter vñ schaffe
freude/Vñ das Saturnus bößheyt verderbt hat-wirt durch die
heylsamen ertzney Juppiters wider bracht. Vñ also wan alle fuß
stapffen der bösen ding auß gereüt seind-vñ die Türcken vmb vñ

umb vertriben seind. so wirt man die chriſten sehe vber Merſarn
vñ fliegen mit hauffen als die muckē. Sant Sophien kirch wirt
wider an sich nemen ire starcke krafft / dā wirt alle gelückliche vñ
selige zeyt wider kumen. Der wald Löw wirt in einem seyden tuch
gefuert zu der mutter der glaubigen. vñ wirt ein newe Reforma-
cion. die wirt lange zeyt weren. Vñ wirt nit mer gehört der nam
des Türckischen Keyſers vnter den Chriſten.

¶ Vnd ist das die Fürſten des Teütſchen landes nit wil faren mit
dem groſſen Adler. so werden vnter inen inderlich krieg an fahen.
vñ wirt kumen der erb Dagloſy Zamus d. xv. Türck regierer. vñ
wirt verwüſten wöllen Meychſſen. Thöringen. heſſen. vñ wirt
kumen in Piccardy. Briabrät. Flandern. vñ bey Cölen. als Mer-
linus geweyſſagt hat. eſchlagen. Diſe ding ſchlieſſent in ewere
hertzen o ir chriſten menſchen.

Ein beſchluſz rede diſer Practica.

¶ Darumb ſo dem also iſt. es begegne ſo vil offenbarlicher zeyche
am himel vñ auff erden. ſo vil ſcheynbarlicher anzeygung der ver-
enderungen. ſo tapffer zeugen der menſchlichen vñ götlichen vor-
wiſſenheyt. ſo habē ſich vil der trübſeligkeyt. yetz langſt an gefan-
gen. darauß die warheyt vñ die gewiſſheyt. der vorgeſagten ding
mögen klerlichen ab genumen werden. wöllet. wie ich im anfang
ermant hab. erwachē. vñ auß gantzen krefften verſuegen. damit
die gantz geiſtligkeyt vnd als volck. ewer vorwaltungen mit den
panzern der höchſten andacht vñ der inprünſtigen lieb. Helmen
der götlichen forcht. mit den ſchildten d heyligen hoffnüg. bayn-
roren. der ſterck. mit den ſchwertern des heyligen creützes. mit den
faceln d waren rew. beycht vñ büß. darnach mit dem geſchutz
einer gutten vor betrachtung. frid. eynigkeyt. hilff vñ rat an einan-
der. gewapnet ſich auff machen. diſen vngefellen vnd götlichen
ſtraffungen zu begegnen. ſchnelliglich in das veld der verſunüg
götlicher gnaden vñ barmhertzigkeyt auß ziehen. vnd den ſtreyt
des gebets. vñ der andechtigen anruſſung des namen chriſti. der
ſunctfrawen Marie. vnd aller gottes heyligen. durch euch ſelbſt

anfahen ewer vñ des gantzen hymelischen heres feyndt. die bösen
sitten v. id gewonheyten. den ebruch. bezwingungen der iunct-
frawen. witwen. weysen. vnd der geystlichen personen. dieberey.
in siderey. den aygen nutz. den wucher. vnd alle andere laster. mit
den waffen einer löblichen Reformation. verenderlig. auffsetzung
vnd verkerung. aller ding zum besten erlegen vnd verdilgen. zum
letzten nach der vberwindung diser feyndt. alle scharen vñ ver-
samlungen. der priesterschafft vnd des volckes mit starcken heyls-
samen bolwercken. zewnen. vñ mauren. der verharrung vñ steten
übungen. der tugenden vñ gutten wercken ombgeben. als dann
wirt nicht allein das reych. sunder die gantz churstenheit. von den
widerwertigkeytten erlediget. vnd ym zeytlichen als hoch als ym
geystlichen erhebt. Demnoch mögt ir durch den weg kumen. an
die endt do alle die den gemeynen nutz betrachtet vñ gemert habē
mit Christo leben vnd herschen in dem höchsten thron der hymel
ymmer vnd ewiglichen. Amen.

¶ Alle stendt der welt haben sich verkeret
Darumb wirt mit plagen sie groß gemert
Die selbigen stendt seind manigfalt
Wie sie dann hernach werden erzalt
Precepta dei werden verschmecht
Membra dei mit fluchen vnrecht
Virtus wirt yetzund nichts mer geacht
Die redligkeyt nun gar wenig macht
Charitas ist gantz gestorben
Veritas an allen orten verdorben
Pax ligt in Franckeyt sere
Iusticiam findt man nyndert mere
Lex ist worden vberall blindt
Honor mit allem grad verschwindt
Gutter meynung seind arm alle stendt
Sintemall eygner nutz den menschen blendt
Principes werden gantzlich kinder
Episcopi sehen durch die finger
Consules müssen die landt regieren

Prelaten thünt das volck verfuere
Religiosi haben nicht geystlich leben
Die Nunnen wöllen nicht auff reformirt geben
Nobiles halten sich zu stelen vnd zu rauben
Mercatores vnd artifices halten kein glauben
Pastores begern der woll vnd nicht der schaff
Oues keren sich wenig an ire straff
Clerici böse beyspill geben
Populus thut auch darnach leben
Judices achtent alles nach gunst
Nequiciam heyst man yezund kunst
Fratres achten der regel nicht groß
Der menschen seind vil Zodome gnoss
Scelus solt nicht vngestraftt bleyben
Potentes thuns am meysten treyben
Communitas ist selten ein
Respublica meret sich klein
Canonici prassen tag vnd nacht
Symoniam haben sie in gutter ache
Ecclesia wirt gantz übel versorgt
Malicia wirt yezund geborgt
Abulterium ist nicht mer schandt
Usura erwechst in allem landt
Mit der Superbia ist yederman wol
Rustici seind aller betrügligkeyt vol
Luxuria ist yezund kein schandt
Gula regiert durch alle landt
Getrawheyt ist worden klein
Falsitas allenhalben gemein
Dazu seind kumen geschlichen die hypocriten
Stationarij auff grossen pferden geritten
Türcken Sarracener vnd Behem sol man erschlagen
So wöl wir vil güetter darvon in der warheyt haben
Die gantze welt wirt also durchzogen
In conscientia mea es ist nicht erlogen


¶ Gedruckt zu Erfordt durch Matthes Maier ym .xvi. Iar

AK Th 1043

Faint, illegible text, likely bleed-through from the reverse side of the page.

961





B.I.G.

Farbkarte #13

Black, 3/Color, White, Magenta, Red, Yellow, Green, Cyan, Blue

...utzung etlicher Dropheteyen. Sibille.

des Abts-Methodij-vñ binder Keins
lich iar/vñ sagt vō wunderlichē dingē.

II h
1043

X 1976169



THECA
VIANA

UNIVERSITÄTS-
HALLE
(SAALE)
BIBLIOTHEK